

39. Æstum suum acerrimum *Mahendræ* montis vertici impressit, sicut rector uncum capiti elephanti contumacis.

40. Armis adortus est eum *Kalingæ* rex, elephantis valens, sicut mons, lapidibus pluens, *INDRAM*, qui alas ejus findere aggreditur.

41. *RAGHUS* ibi sagittarum imbrem passus, quasi prospere ablutus, victoriæ fortuna potitus est.

42. Ibi milites, arecæ foliis potandi locum adornantes, biberunt vinum, e *nálikeris* factum, hostiumque gloriam.

43. Rex ille, solius justitiæ caussa vincere cupiens, a *Mahendræ* domino, quem ceperat atque rursus dimiserat, bonam fortunam sumpsit, non vero terram.

44. Tum per litus, frugiferis *Arecæ* palmis coronatum, profectus est ad plagam, ab *AGASTYA* occupatam, victoriam non desiderans.

45. Rex militum suorum oblectationibus, quæ elephantorum liquoris odorem spargebant, *Káverim* Oceano suspectam quasi reddidit.

46. Ab illius, victoriæ caussa procedentis, militibus occupata est planities ad pedem *Malayæ* montis, in cujus piperis arboribus columbæ circumvolabant.

47. Fructuum pulvis, evolans e cardamomi arboribus, quos equi commoverant, consedit in elephantorum ebriorum temporibus, simili odore præditis.

48. Quamquam in ipsis serpentum vestigiis, *santali* arbores cingentibus, alligata, haud decidit catena elephantorum, qui vel pedum vincula frangere valuissent.

49. In regione australi vel solis ardor hebetatur; ibi vero *Panduensium* reges *RAGHUIS* ardorem non tulerunt.

50. Illi procumbentes dederunt *RAGHUI*, quasi gloriam suam, optimas margaritas collectas ex oceano, ubi *Támraparnis* in eum sese effundit.

51. Postquam ille in litore pro libidine sese delectasset *Malaya* et *Dardura* montibus, *santali* arboribus tectis, quasi plagæ illius mammis:

52. Intoleranda vi præditus trajecit *Sahyam* montem, a quo oceanus longe recessit, quasi terræ clunes, veste decidua nudatas.